



**GAZETI RASMI LA SERIKALI YA
MAPINDUZI YA ZANZIBAR
(Hupigwa Chapa kwa Amri ya Serikali)**

Sehemu ya CXXIX Nam. 6791

07 Januari, 2020

Bei Shs. 2,500/=

Imekubaliwa na Mkuu wa Posta kuwa ni Gazeti

YALIYOMO

Ukurasa

Mswada wa Sheria ya kuweka Masharti yanayohusiana na Haki na Huduma za Ustawi kwa Wazee, na Kuanzisha Mpango wa Pensheni Jamii, Usimamizi wake na mambo mengine yanayohusiana na hayo

02

SEHEMU YA SHERIA

Tangazo la Mswada lililotajwa hapo chini linatangazwa katika ***Gazeti Rasmi*** hili

Tangazo la Mswada

Nam. :- Mswada wa Sheria ya kuweka Masharti yanayohusiana na Haki na Huduma za Ustawi kwa Wazee

TANGAZO

Mswada ufuatao utawasilishwa katika Mkutano wa Baraza la Wawakilishi utakaoanza tarehe 27 Novemba, 2019 kwa kusomwa kwa mara ya kwanza na unachapishwa pamoja na Madhumuni na Sababu zake kwa ajili ya kutoa taarifa kwa wananchi.

ZANZIBAR
06 Novemba, 2017

(Dkt. ABDULHAMID Y. MZEE)
***Katibu wa Baraza la Mapinduzi na
Katibu Mkuu Kiongozi.***

MSWADA*wa***SHERIA YA KUWEKA MASHARTI YANAYOHUSIANA
NA HAKI NA HUDUMA ZA USTAWI KWA WAZEE,
NA KUENZISHA MPANGO WA PENSHEMI JAMII,
USIMAMIZI WAKE NA MAMBO MENGINE
YANAYOHUSIANA NA HAYO****IMETUNGWA** na Baraza la Wawakilishi la Zanzibar.**SEHEMU YA KWANZA
MASHARTI YA AWALI**Jina fupi
na kuanza
kutumika.**1.** Sheria hii itajulikana kama Sheria ya Masuala ya Wazee, 2019 na itaanza kutumika kwa tarehe ambayo Waziri ataitangaza katika Gazeti la Serikali.

Matumizi.

2. Sheria hii itatumika kwa wazee, taasisi na makaazi yanayotoa huduma kwa wazee ndani ya Zanzibar.

Ufafanuzi.

3. Katika Sheria hii, isipokuwa maelezo yatahitaji vyenginevyo:

“Familia” maana yake ni kundi la watu wenye uhusiano wa damu, ndoa au kuasili na mzee;

“Hifadhi” maana yake ni jengo au maeneo yaliowekwa au yanayotumika kwa ajili ya kupokea, kuhifadhi na kutoa matunzo ya muda kwa mzee anayehitaji matunzo na hifadhi;

“Huduma” maana yake ni shughuli yeyote au mpango uliowekwa kukidhi mahitaji ya mzee;

“Huduma za matunzo na msaada wa Kijamii” maana yake ni mpango wowote ulioanishwa katika Sehemu ya Nne ya Sheria hii;

“Huduma za matunzo ya nyumbani” maana yake ni matunzo au huduma zinazotolewa na mtoa matunzo katika eneo analoishi mzee asiyejiweza ili kuhakikisha anapata kiwango cha juu cha huduma kinachoridhisha mpaka kufikia mwisho wa maisha yake, isipokuwa wazee waliokuwepo katika makaazi;

“Huduma za msingi” inajumuisha utoaji wa chakula, huduma za afya, makaazi, usafi wa mwili na maji;

“Matunzo” maana yake ni usaidizi wa kimwili, kiakili, kijamii au kifaa kwa mzee, na inajumuisha huduma zinazolenga katika kuimarisha maisha na ustawi wa jumla wa mzee;

“Mtoa matunzo” maana yake ni mtu anayetoa matunzo kwa mzee;

“Mzee” maana yake ni mtu yeyote mwenye umri wa miaka 70 au zaidi;

- “Mzee anayehitaji matunzo na hifadhi” maana yake ni mtu kama alivyoainishwa katika Sehemu ya Tatu ya Sheria hii;
- “Makaazi” maana yake ni makaazi ya wazee yanayotoa huduma kwa wazee;
- “Mpango” maana yake ni Mpango wa Pencheni Jamii Zanzibar;
- “Mpokeaji pencheni” maana yake ni mtu anayestahiki kupokea pencheni;
- “Msaada wa kijamii” maana yake ni maslahi katika namna ya kitu au uhaulishaji unaofanywa na Serikali au taasisi ya kiraia au watu binafsi kwa kaya kufikia mahitaji ya msingi ya wazee;
- “Mtoa huduma za afya” maana yake ni mtoa huduma za afya kama ilivyotafsiriwa katika sheria za Zanzibar;
- “Pencheni” maana yake ni malipo yalioainishwa katika Sehemu ya Sita ya Sheria hii;
- “Serikali” maana yake ni Serikali ya Mapinduzi ya Zanzibar;
- “Serikali za mitaa” maana yake ni Serikali za mitaa kama zilivyotafsiriwa katika Sheria ya Mamlaka ya Serikali za Mitaa, Zanzibar;
- “Sheria” maana yake ni Sheria ya Masuala ya Wazee, 2019;
- “Udhalilishaji” maana yake ni aina mbali mbali za vitendo au tabia dhidi ya wazee kama ilivyoielezwa katika kifungu cha 22 (2);
- “Urekebishaji” maana yake ni utaratibu unaomuwezesha mzee kufikia na kuimarisha hali yake kimwili, kihisia, ufahamu, kiakili au kijamii;
- “Vifaa vya usaidizi” maana yake ni vifaa na nyenzo zinazotolewa kwa mzee kumwezesha kufanya shughuli zake za kila siku;
- “Waziri” maana yake ni Waziri anayehusika na masuala ya wazee;
- “Watoa huduma” maana yake ni makaazi au mtu ambae anatoa huduma zilizowekwa kukidhi mahitaji ya mzee;
- “Wizara” maana yake ni Wizara inayohusika na masuala ya wazee;

SEHEMU YA PILI
MISINGI YA JUMLA, HAKI, STAHIKI NA WAJIBU

4.-(1) Mwenendo wa kesi zote, hatua au maamuzi katika jambo linalohusiana na mzee: Misingi
ya jumla.

- (a) yataheshimu, yatahifadhi, yataimarisha na yatatambua haki za wazee, maslahi bora ya mzee na haki na misingi iliyowekwa katika Sheria hii, kwa kuzingatia mipaka ya kisheria;

- (b) yataheshimu hadhi ya wazee inayostahiki;
- (c) yatamtendea mzee kwa haki na usawa; na
- (d) yatamlinda mzee dhidi ya aina yoyote ya ubaguzi na udhalilishaji.

Haki za msingi za mzee.

5. Mzee katika jamii atakuwa na haki za msingi zifuatazo:

- (a) kushiriki katika masuala ya kijamii katika nafasi yoyote inayomstahiki katika maslahi na uwezo wake;
- (b) kuanzisha na kushiriki katika jumuiya zinazohusika na wazee;
- (c) kushiriki katika shughuli ambazo zitakazomuwezesha kupata kipato;
- (d) kuishi katika mazingira yanayoendana na mabadiliko ya hali yake;
- (e) kupata fursa ambazo zitakuza kiwango chake cha ustawi kijamii, kimwili, kiakili na kihisia;
- (f) kuendeleza maendeleo yake binafsi;
- (g) kusimamia mali yake;
- (h) kuishi kwa hadhi na kuwa huru dhidi ya udhalilishaji;
- (i) kupokea matunzo yanayofaa na msaada kutoka katika familia yake, Serikali au mtu mwengine yoyote.
- (j) kupata huduma zinazohusiana na shughuli za hifadhi ya jamii; na
- (k) kusajiliwa katika daftari la wazee.

Haki ya kuwakilishwa kisheria.

6. Mzee ana haki ya kuwakilishwa kisheria na haki ya kushiriki katika hatua zote na kupata msaada muhimu kwa ajili ya kuwakilishwa kisheria.

Haki ya kutambulishiwa katika kupata huduma za kijamii.

7. Mzee ana haki ya kupatiwa kitambulisho ambacho kitamuwezesha kupata huduma na hati nyengine yoyote ya utambulisho.

Haki ya hadhi ya ubinaadamu.

8. Mzee atakuwa na haki ya kuishi kwa hadhi, usalama, kuwa huru dhidi ya unyonyaji na udhalilishaji wa kimwili au kiakili.

Haki ya hifadhi na usalama wa mzee.

9. Mzee ana haki ya hifadhi inayofaa na maalumu na usalama katika hali za hatari, ikijumuulisha hali vita, maafa na matukio ya majanga ya kiasili.

10. Mzee atakuwa na haki ya kupata huduma za afya bure na matibabu maalum katika kituo chochote cha afya cha umma. Haki ya afya.

11. Mzee ana haki ya kupata habari ambayo ni muhimu kwa maslahi na ustawi wake. Haki ya kupata habari.

12.-(1) Mzee ana haki ya:

(a) kuruhusiwa kuingia katika maeneo yoyote ambayo wananchi kikawaida wanaruhusiwa; au Haki ya kuruhusiwa kuingia katika maeneo ya umma na binafsi.

(b) kupatiwa huduma na mahitaji ambayo wananchi wanastahiki.

(2) Mmiliki wa maeneo binafsi ambayo yanatoa huduma za kijamii hatoizuia haki ya mzee kuingia katika maeneo yake.

13.-(1) Mzee ana haki ya kushiriki katika shughuli za michezo, burudani, mapumziko na tamaduni zikiwemo matukio ya michezo ya Kitaifa na Kimataifa. Haki ya michezo, burudani, kupumzika na tamaduni.

(2) Mzee anastahiki kutumia bila ya malipo huduma za michezo na burudani zinazomilikiwa au kuendeshwa na Serikali wakati wa sherehe za shughuli za kijamii, michezo na burudani.

(3) Kifungu kidogo cha (2) cha kifungu hiki hakitatumika pale ambapo huduma hizo zitatolewa na mtu binafsi.

14.-(1) Mzee hatakiwi kuingiliwa bila ya sababu ya msingi katika masuala yake ya faragha, familia, nyumba au mawasiliano ya barua au aina nyingine za mawasiliano. Haki ya faragha.

(2) Makaazi ya umma au binafsi yatatunza taarifa za siri za binafsi, za afya na za urekebishaji wa mzee.

15.-(1) Mzee ana haki ya kuelimishwa kuhusiana na umuhimu wa kuweka wosia na uwakala kwa ajili ya kulinda mali yake. Haki za kumiliki mali.

(2) Mzee ana haki ya kumiliki na kutoa mali yake kwa namna ambayo anaona inafaa kwa mujibu wa uwezo wake.

16. Wizara itaweka utaratibu wa kuwasiadia wazee ambao wanawahudumia Watoto wenye mazingira magumu. Msaada kwa wazee wanaohudumia watoto wenye mazingira magumu.

17.-(1) Kila mzee ana wajibu kwa familia yake, jamii, Serikali na taasisi za kimatifa. Wajibu wa mzee.

(2) Kwa madhumuni ya kifungu kidogo cha (1) cha kifungu hiki, mzee:

(a) atatoa mafunzo na kuwapatia elimu na uzowefu watoto na vijana;

- (b) atawezesha majadiliano na mshikamano ndani ya familia yake na jamii; na
 - (c) atachukua jukumu la kusuluhisha migogoro.
- (3) Mzee hatotumia vibaya haki au fursa zilizotolewa chini ya Sheria hii.

Wajibu wa familia.

18. Katika kumtunza mzee, familia ambayo mzee anaishi itakuwa na wajibu wa:

- (a) kutoa upendo, huruma, chakula, hifadhi na kumpatia mahala pa kuishi;
- (b) kuisaidia jitihada za Serikali na Serikali za mitaa katika kutoa gharama za matibabu kwa ajili ya mzee aliyepata maradhi na kumpatia huduma za uangalizi;
- (c) kumwezesha kuishi na mwenza wake isipokuwa kama kuna mazingira yanayolazimisha kutenganishwa;
- (d) kuendeleza umiliki wa mali zake zikiwemo nyumba au mapato yoyote yanayotokana na mali anazozimiliki; na
- (e) kutoa misaada wowote unaofaa kila unapohitajika.

Wajibu wa jamii.

19. Jamii itakuwa na wajibu wa kulinda maslahi bora ya wazee katika jamii.

SEHEMU YA TATU WAZEE WANAOHITAJI MATUNZO NA HIFADHI

Mzee anayehitaji matunzo na hifadhi.

20. Mzee anayehitaji matunzo na hifadhi ni ambaye:

- (a) aliyeondolewa kutoka katika makaazi yake bila ya ridhaa yake au kinyume na sheria amepokonywa mali yake anayomiliki kihalali;
- (b) aliyetelekezwa au aliyetupwa bila ya msaada wowote;
- (c) anaishi au anazurura mitaani au anaomba omba;
- (d) anatumia au ameathirika na dawa za kulevywa na bila ya kupata msaada wowote au huduma ya kuondekana na matumizi ya dawa za kulevywa;
- (e) anaishi katika mazingira ambayo yanapelekea au yanasababisha kutekwa au kudhalilishwa ikiwemo udhalilishaji wa kingono au kiuchumi;
- (f) anaishi au yupo katika mazingira yanaweza kusababisha madhara ya kimwili au kiakili au yupo katika hali ya kutelekezwa kimwili, kiakili au kijamii; na

- (g) yupo katika mazingira mengine yoyote ambayo Wizara inaona kuwa mzee anastahiki.

21.-(1) Mtu ambaye ana sababu ya msingi ya kuamini kwamba mzee anahitaji matunzo na hifadhi atatoa taarifa hiyo kwa ama:

Wajibu wa kutoa taarifa.

- (a) Sheha;
- (b) Kituo cha Polisi; au
- (c) Wizara.

22.-(1) Mtu anayemdhalilisha mzee atakuwa ni mkosa na akitiwa hatiani atahukumiwa kifungo cha kipindi kisichozidi miaka kumi na nne au faini isiyopungua Shilingi Milioni Mbili au adhabu zote mbili.

Kosa dhidi ya mzee.

(2) kwa madhumuni ya kifungu kidogo cha (1) cha kifungu hiki, “udhalilishaji” unajumuisha wa kimwili, kingongo na kiakili, na:

- (a) “udhalilishaji wa kimwili” maana yake ni kitendo chochote au vitisho vya ukatili wa kimwili dhidi ya mzee;
- (b) “udhalilishaji wa kingono” maana yake ni kitendo chochote kinachovunja heshima ya kijinsia ya mzee na kosa jengine lolote chini ya Sheria ya Adhabu;
- (c) “udhalilishaji wa kiakili” maana yake ni kitendo cha kushusha hadhi au kumtia aibu mzee, ikijumuisha:
- (i) matusi yanayojirejea, dharau au kuita jina baya;
- (ii) vitisho vinavyojirejea au kumsingizia uongo ambao unaweza kusababisha maumivu ya kihisia; na
- (iii) kuingia kwa nguvu kunakojirejea kwenye faragha, uhuru, heshima au usalama wa mzee.

SEHEMU YA NNE
HUDUMA ZA MATUNZO NA MSAADA
WA KIJAMII KWA WAZEE

23.-(1) Mamlaka ya Serikali ya Mtaa inaweza kuanzisha huduma za matunzo na msaada wa kijamii kwa lengo la kuwahuduma wazee wanaoishi katika eneo lake.

Kuanzisha huduma za matunzo na msaada wa kijamii.

(2) Waziri anaweza kutoa muongozo juu ya kuanzishwa kwa huduma za matunzo na msaada wa kijamii.

(3) Msaada wa kijamii ulioanishwa katika kifungu kidogo cha (2) cha kifungu hiki unaweza kujumuisha:

- (a) msaada wa kisheria;
- (b) msaada wa kisaikolojia;
- (c) huduma za afya;

(d) uanalizi: na

(e) msaada mwengine wowote kutegemea na mazingira ya mzee.

Haki za
mzee
katika
huduma za
matunzo na
msaada wa
kijamii.

24. Mzee anayepata huduma za matunzo na msaada wa kijamii, pamoja na haki zilizoainishwa katika Sehemu ya Pili ana haki:

(a) kuishi katika familia au makaazi kwa kadiri iwezekanavyo;

(b) kupata fursa za kumuendeleza kufikia uwezo wake kamili; na

(c) kufaidika na matunzo na hifadhi kutoka katika familia na jamii kwa mujibu wa mila na desturi.

Ufuatiliaji
na tathmini
ya huduma
za matunzo
na msaada
wa kijamii.

25.-(1) Wizara itafuatilia na kutathmini huduma za matunzo na msaada wa kijamii.

(2) Utaratibu wa ufuatiliaji na tathmini ya huduma hizo utaelezwa katika Kanuni.

SEHEMU YA TANO USAJILI WA MAKAAZI YA WAZEE

Maombi
kwa ajili ya
usajili.

26.-(1) Mkaazi ya wazee hayatatoa huduma bila ya kupata usajili rasmi.

(2) Taratibu za usajili zitaelezwa katika Kanuni zitakazoandaliwa na Waziri.

Kukataa
kusajili.

27. Waziri anaweza, ikiwa ameridhika kwamba muombaji ameshindwa kukidhi masharti yalioelezwa ya usajili katika Kanuni, kukataa kumsajili muombaji huyo, na atamjulisha muhusika kwa maandishi sababu za kukataa huko.

Kusitisha
au kufuta
usajili.

28.-(1) Endapo makaazi ya wazee yalioidhinishwa yameshindwa kufikia vigezo vinavyohitajika, Wizara inaweza kusitisha au kufuta usajili.

(2) Kabla ya kusitisha au kufuta usajili, Wizara:

(a) itamjulisha muombaji kwa maandishi nia ya kusitisha au kufuta; na

(b) itampa muombaji fursa ya kusikilizwa au kuwakilishwa.

(3) Wizara inaweza, kwa taarifa ya maandishi, kumtaka muombaji kurekebisha makosa katika uendeshaji wa makaazi.

(4) Endapo muombaji anashindwa kukidhi masharti ya taarifa iliyotolewa chini ya kifungu kidogo cha (3) cha kifungu hiki, wizara inaweza kuendelea na kusitisha au kufuta usajili huo.

29. Mtu ambaye hakuridhika na maamuzi ya Wizara ya kukataa Rufaa. kumpatia muombaji usajili, kusitisha usajili au kufuta usajili chini ya Sehemu hii, anaweza kukata rufaa kwa Waziri ndani ya siku thelathini kutoka tarehe ya kukataa au kusitisha au kufuta.

30.-(1) Wizara itafuatilia na kusimamia kuhakikisha kwamba makaazi Jukumu la Serikali. yote ya wazee yanakuwa katika hali nzuri na kuendeshwa ipasavyo.

(2) Waziri atanzisha utekelezaji wa sera na programu zinazohusiana na wazee.

SEHEMU YA SITA MPANGO WA PENCHENI YA JAMII

31. Kunaanzishwa Mpango wa Pencheni Jamii ambao utaratibiwa na Kuanzisha Mpango wa Pencheni Jamii. Wizara.

32.-(1) Kutakuwa na kiwango kitakachotolewa kwa kila mzee ambaye Kiwango. anastahiki kupokea pencheni kutoka katika Mpango wa Pencheni Jamii.

(2) Kiwango kilichotajwa katika kifungu kidogo cha kwanza cha kifungu hiki, kitalipwa kila mwezi.

(3) Waziri kwa mujibu wa idhini ya Baraza la Mapinduzi atatangaza katika Gazeti la Serikali kiwango cha kulipwa kwa wazee.

33.-(1) Mzee ataomba kwa Wizara kupitia Sheha wake na Mkuu wa Maombi na sifa za kuingizwa katika Mpango wa Pencheni Jamii. Wilaya kuingizwa katika Mpango wa Pencheni Jamii.

(2) Mzee hatokuwa na sifa ya kuomba kuingizwa katika Mpango wa Pencheni Jamii isipokuwa mzee huyo:

- (a) ana umri wa miaka 70 au zaidi;
- (b) ni Mzanzibari mkaazi; au
- (c) amekuwa mkaazi wa Zanzibar kwa zaidi ya miak kumi mfululizo.

(3) Maombi yanayofanywa chini ya kifungu kidogo cha(1) cha kifungu hiki yataambatana na yafuatayo:

- (a) picha mbili ndogo za karibuni;
- (b) cheti cha kuzaliwa au hati ya kiapo cha kuzaliwa; na
- (c) Kitambulisho cha Mzanzibari.

(4) Umri uliotajwa katika kifungu kidogo cha (2) (a) unaweza kupunguzwa au kuongezwa na Waziri kwa kushauriana na Baraza la Mapinduzi.

Kusitishwa. **34.**-(1) Mpokeaji pencheni atasita kupokea pencheni ya mwezi ikitokea moja kati ya yafuatayo:

- (a) kifo;
- (b) hadaa; au
- (c) udanganyifu.

(2) Utaratibu wa kutoa taarifa kuhusiana na matukio yaliyoainishwa chini ya kifungu kidogo cha (1) cha kifungu hiki utaelezwa katika kanuni.

SEHEMU YA SABA MASHARTI MENGINEYO

Kuanzisha
kwa
jumuiya au
taasisi za
wazee. **35.**-(1) Wizara inaweza kuwezesha uanzishaji wa jumuiya au taasisi huru za wazee.

(2) Katika kuanzisha jumuiya au taasisi, wazee watazingatia mambo yafuatayo:

- (a) jumuiya au taasisi iwafanye wazee kuwa pamoja na katika kulinda maslahi yao;
- (b) kuratibu mashirikiano kati ya wazee na Serikali, sekta binafsi, jumuiya za kiraia na taasisi nyingine zenye maslahi yanayolingana;
- (c) kuhamasisha na kushauri Serikali katika ngazi ya taifa na mtaa katika mambo mbali mbali yenye maslahi ya jamii; na
- (d) kuelekeza na kuongoza watoto na vijana katika jamii.

Adhabu ya
jumla. **36.** Mtu anayekwenda kinyume na kifungu chochote cha Sheria hii, isipokuwa kifungu cha 17 (1), ambacho haikutajwa adhabu yake maalumu atatozwa faini isiozidi Shilingi Milioni Moja au kifungu cha kipindi kisichozidi mwaka mmoja au adhabu zote mbili.

Kanuni. **37.** Waziri anaweza kutunga Kanuni katika jambo lolote ambalo ni muhimu kwa utekelezaji wa masharti ya Sheria hii.

MADHUMUNI NA SABABU

Madhumuni na sababu za Mswada huu ni kuweka taratibu za sheria za kulinda haki na ustawi wa wazee na kuwezesha upatakanaji wa huduma zao kwa kuzingatia uwezo na mahitaji yao. Mswada huu pia unakusudia kuanzisha Mpango wa Pencheni Jamii kwa ajili ya uendelezaji ya utoaji wa malipo ya mwezi kwa wazee.

Zaidi ya hayo, Mswada huu unaweka masharti ya kuanzisha huduma za matunzo na hifadhi ya kijamii kwa ajili ya kusogeza huduma za jamii karibu na wazee katika jamii zao. Pia, Mswada huu unaweka masharti kuhusu dhima ya Serikali katika kuwatumia wazee ambao wanahitaji matunzo na hifadhi.

Mswada huu umegawika katika Sehemu Saba:

Sehemu ya Kwanza: inaweka masharti ya awali ambayo yanajumuisha jina fupi na kuanza kutumika, matumizi; na ufafanuzi wa maneno mbali mbali yaliotumika katika Mswada huu.

Sehemu ya Pili: unapendekeza masharti yanayohusiana na misingi ya jumla, haki, stahiki na wajibu. Sehemu hii inaelezea haki za jumla za mzee, haki ya uwakilishi kisheria, haki ya kuwakilishwa kisheria, haki ya kutambuliwa katika kupata huduma za kijamii na haki ya hadhi ya ubinaadamu. Sehemu hii pia inahusika na masharti ya kuhifadhi na kumlinda mzee, Haki ya afya, haki ya kupata habari, haki ya kuruhusiwa kuingia katika maeneo ya umma na binafsi, haki ya michezo, burudani, kupumzika na tamaduni na haki ya faragha. Sehemu hii inaweka masharti ya wajibu wa wazee, wajibu wa familia na wajibu wa jamii.

Sehemu ya Tatu: inaweka masharti yanayohusika na wazee wanaohitaji matunzo na hifadhi pia wajibu wa kutoa taarifa dhidi ya udhalilishaji wa wazee na kosa dhidi ya mzee.

Sehemu ya Nne: inatoa maelezo yanayohusu huduma za matunzo na msaada wa kijamii amabayo inahusisha uanzishaji wa huduma za matunzo na msaada wa kijamii, haki za wazee katika huduma za matunzo na msaada wa kijamii na ufuatiliaji na tathmini ya huduma hizo.

Sehemu ya Tano: inaelezea kuhusu usajili wa makaazi ya wazee amabayo yanajumuisha maombi ya usajili, taratibu za usajili, kukataa kusajili, kusitisha au kufuta usajili, na wajibu wa Serikali.

Sehemu ya Sita: inapendekeza masharti ya Mpango wa Pencheni Jamii kama kuanzisha mpango huo, maombi na sifa za kuingizwa katika Mpango wa Pencheni Jamii na kumsitisha mpokeaji wa pencheni.

Sehemu ya Saba: inaelezea masharti ya jumla amabayo yanajumuisha kuanzisha jumuiya au taasisi za wazee, adhabu ya jumla na Kanuni.

